

Scan me baby!

Ei-Fon, Gäläxy oder was o immer
es chunt verdeggeli no viel schlimmer
S'passende Äpp muesch au no kenne
denn chasch die Karo-Fläggli ändlich scenne

Gosch i d'Migros und wotsch e Brot
fingsch verdelli e QR-Kod
A dr Kasse scenne sis i
und alli Date si scho drbi

Wenn das so witter goht
bstellsch i dr Beiz nur no mit QR-Kod
und hesch di Handy dähei vergässä
bechunsch grad nüt zum Frässä

E Stadtpresi ganz „clever, smart and more“
das isch dr Alex mit de graue Hoor
Si Gring bi dä Wahle am Strosserand stoht
a dr Fasnacht gsehsh ihn als QR-Kod

Willsch wüsse wies mir goht
luegsch is Facebook wos dinne stoht
Willsch mi nöcher lehre kenne
chasch jetz mi QR-Kod scenne

Eigentlich si mir jo alli gstorbe
d'Mayas hei drfür scho welle Sorge
Das alles duet eus o nid hemme
drum dien mir fröhlich witter scenne

Hesch e Gripen bisch in Not
kei Problem, frog dr Bundesrot
Ob dä Vogel chunt oder goht
das stoht im QR-Kod

Wotsch mit em Bummler uf Basel fahre
duesch statt s'Billet e QR-Kod zahle
Doch viel nützt eus das Laufetaler nid
wenn's die Strecki übermorn nümm git

Mir si doch alles geili Sieche
vo de Finne bis zu de Grieche
Äs isch aber nid zum lache
mit QR-Kod chasch kei Gäld mache

D'Schwobe die dien ziemli spinne
dien gege s'Stürabkomme stimme
CD's wei sie chaufe
mit ärä wunderschöne Schlaufe
QR-Kod das ischs Motto
„Hey Schwobe das isch wie ä 6er im Lotto!“

Suechsch ä Maa oder ä Frau
fingsch das a dr Singlebörse au
Mit em Handy scannsch es i
und di super Typ isch drbi

Lämmli zue, denn Lämmli uf
denn Lämmli zue, denn wieder uf
Mir hoffe dr Wirt cha das no biege
bevor d'Frau Gygax e Rigel duet schiebe

Dr Alex Frei het ä Schiebe
är duet jetz no ä Biografie schriebe
Dr Yakin isch gar nid iverstange
„Schiess lieber dr Ball mol zwüsche
d'Stange!“

S'Räbeli isch leider gstorbe
aber das Joohr isch no öbis drus worde
S'nechst Joohr stöh mir glich o a
fürs Gabare vom singende Guafförmaa

D'Maya Graf het ä klari Forderig gha
wot numme Bio-Produkt ha
Öpfelsaft gits umsveregge
ä guete Wyssse würd aber besser schmegge

Blocherli, Baderli und Mörgeli
si allisamt e chli Nörgeli
Duet me eine a dr Fakultät spigge
duet er eifach e neuu Bewärbig verschigge

Es isch nid wie zu Bärner-Zyte
e neus Zytalter isch iglütte
Bezirksschriber und Richter göh verlore
aber dr Bär duet me noni übermole

D'Füürwehr platzt us allne Nöt
das finge alli Lüt ganz blöd
S'Häxehüsli muess drum wiche
d'Häx dort drinn die mir verschüche

Neui Gsetz würde doch nütze
eusi Privatsfährri besser z'schütze
Statt neuu Paragrafe z'kreirä
dien sie lieber mit dä Stetter fusioniere.

